

ODBOJKAŠKI SAVEZ FEDERACIJE  
BOSNE I HERCEGOVINE

**PRAVILNIK**  
**o zdravstvenoj zaštiti u OSFBiH**

Tuzla 01.07.2015. godine

Na osnovu člana 29. Statuta Odbojkaškog saveza Federacije Bosne i Hercegovine, Upravni odbor Odbojkaškog saveza Federacije Bosne i Hercegovine dana 01.07.2015. godine, donio je

## **PRAVILNIK o zdravstvenoj zaštiti u OS FBiH**

### **Član 1.**

Ovim Pravilnikom se uređuju pitanja vezana za zdravstvenu zaštitu sportista i sportskih radnika Odbojkaškog saveza Federacije Bosne i Hercegovine u skladu sa obavezama koje proističu iz Zakona o sportu BiH, akata Odbojkaškog saveza Federacije Bosne i Hercegovine, FIVB i CEV, a primjenjuju se u svim takmičenjima u organizaciji OSF BiH.

### **Član 2.**

Aktivni igrači i igralice, treneri i sudije moraju se redovno medicinski pregledati, na osnovu čega se određuju njihova zdravstvena, fizička i psihička sposobnost za trening i takmičenje.

### **Član 3.**

Obavezni sistematski pregledi igrača i igračica obavljaju se dva puta godišnje, trenera jednom godišnje, sudija i delegata-kontrolora jednom u takmičarskoj sezoni na početku.

Obavezni sistematski pregledi igrača i igračica, trenera, delegata-kontrolora i sudija pred početak takmičarske sezone.

### **Član 4.**

Obavezni sistematski pregled igrača, igračica, trenera, sudija i delegata-kontrolora obavljaju se po uputstvu Medicinske komisije Odbojkaškog saveza Federacije Bosne i Hercegovine i na osnovama jedinstvene medicinske doktrine.

### **Član 5.**

Obavezni sistematski pregled igrača, igračica, trenera, sudija i delegata-kontrolora vrše se u sportsko-medicinskim i drugim medicinskim ustanovama osposobljenim za tu vrstu pregleda.

### **Član 6.**

Medicinsku zaštitu igrača i igračica i rad sa njima u klubu mogu vršiti ljekari i stručno medicinsko osoblje (maseri-fizioterapeuti) koji imaju licencu Odbojkaškog saveza Federacije Bosne i Hercegovine.

### **Član 7.**

Svi klubovi su obavezni da vode posebne zdravstvene kartone za igrače odnosno igralice.

U zdravstvenim kartonima moraju biti registrovani svi nalazi sistematskog pregleda i ovjereni od nadležne medicinske ustanove.

Uz licencu obavezan je dokaz o zdravstvenoj sposobnosti učesnika u takmičenju (ovjerenu od nadležne zdravstvene ustanove na licenci u Super lihi i Federalnim ligama i KUP-u FBiH, odnosno na takmičarskoj legitimaciji u takmičenju mlađih kategorija).

### **Član 8.**

Ako ljekar prilikom obaveznog sistematskog pregleda ustanovi da igrači-igračice, trener, sudija i delegat-kontrolor nije fizički i psihički sposoban za takmičenje neće mu se dozvoliti sportske aktivnosti sve dok se zdravstveno stanje ne popravi.

### **Član 9.**

Medicinske ustanove koje vrše sistematske preglede mogu izdavati i posebne dozvole za nastup u starijim kategorijama igrača i igračica u skladu sa Pravilnikom o takmičenju i propozicijama odgovarajućeg takmičenja.

### **Član 10.**

Za svaku odbojkašku utakmicu, bez obzira na rang takmičenja, uzrast i kategoriju, klub domaćin je obavezan osigurati prisustvo ljekara sa propisanom priručnom apotekom u sportskoj dvorani.

### **Član 11.**

Svaka sportska dvorana u kojoj se igraju odbojkaške utakmice mora imati priručnu apoteku za pružanje prve pomoći i nosila.

Sastav priručne apoteke utvrđuje se posebnim upustvom Medicinske komisije Odbojkaškog saveza Federacije Bosne i Hercegovine.

### **Član 12.**

Zabranjeno je u cilju postizanja boljih rezultata i podizanja snage takmičara, uzimati stimulativna farmakološka-doping sredstva koja nisu na pozitivnoj listi lijekova koje mogu uzimati sportisti.

Spisak tih sredstava biće naveden u posebnom upustvu Medicinske komisije Odbojkaškog saveza Bosne i Hercegovine.

### **Član 13.**

Licence Odbojkaškog saveza iz člana 6. ovog Pravilnika izdaju se na godinu dana. Medicinska komisija Odbojkaškog saveza može ukinuti licencu izdatu medicinskom radniku ukoliko utvrdi da se ogriješio o kodeks medicinskih ponašanja.

Da bi dobio licencu za tekuću sezonu, svaki ljekar mora dostaviti ovjerenu kopiju diplome o stručnosti.

### **Član 14.**

Dežurna medicinska služba u sportskoj dvorani dužna je da pruži stručnu pomoć povrijeđenom učesniku u utakmici, uključujući u slučaju potrebe i gledaoce.

Dežurni ljekar na utakmici u slučaju potrebe da interveniše ulazi u teren samo na poziv odbojkaškog sudije.

Kod svih težih sportskih povreda dežurni ljekar dužan je povrijeđenog uputiti u najbližu medicinsku ustanovu.

### **Član 15.**

Klubski ljekar je stručno medicinsko lice koje radi u odbojkaškom klubu:

- a) u stalnom radnom odnosu,
- b) u honorarnom radnom odnosu,
- c) kao amaterski radnik.

### **Član 16.**

Klubski ljekar može biti specijalista sportske medicine, specijalista medicine rada, specijalista fizikalne medicine, ortoped, ljekar opšte prakse, specijalista hirurških grana, specijalista iz internističke oblasti i specijalista medicinskih nauka.

### **Član 17.**

Klubski ljekar je član stručnog štaba i član medicinske komisije klubova.

Ljekar reprezentacije je član stručnog štaba odgovarajuće reprezentativne selekcije i član medicinske komisije Odbojkaškog saveza Bosne i Hercegovine.

### **Član 18.**

Dužnosti lekara su:

- a) da organizuje klubске ambulante,
- b) da organizuje sprovođenje sistematskih i kontrolnih pregleda,
- c) da vodi klubsku medicinsku kartoteku sa individualnim kartonima,
- d) da vodi stalnu brigu o zdravstvenom stanju svih igrača odnosno igračica, da povrijeđenim i bolesnim pruži stručnu pomoć i odredi način liječenja,
- e) da preko medicinskih pregleda i testiranja funkcionalnih sposobnosti prati stanje i njihovu pripremljenost,
- f) da posebnu pažnju u svom radu posveti preventivnoj medicinskoj aktivnosti. U tom smislu može treneru odobriti ili zabraniti upotrebu raznih rekvizita i posebnih vježbi u trenažnom procesu, vodeći računa o fizičkim sposobnostima igrača odnosno igračica,
- g) da pruži medicinsku pomoć igračima odnosno igračicama za vrijeme treninga i utakmice.

### **Član 19.**

Klubski ljekar ima pravo na:

- a) stručno usavršavanje iz oblasti sportske medicine koje finansira klub,
- b) materijalnu naknadu za izostajanje sa svog radnog mjesta zbog klubskih potreba

### **Član 20.**

Svaki klub može za svoje potrebe angažovati fizioterapeuta-masera.

Fizioterapeut-maser koji radi u klubu može biti lice sa završenom najmanje srednjom medicinskom školom fizioterapeutske tehničar.

Svaki Klub mora dostaviti ovjerenu kopiju o završenoj školskoj spremi, prije izdavanja licence fizioterapeutu.

### **Član 21.**

Klubski fizioterapeut-maser dužan je da saraduje sa klubskim ljekarom i trenerima svih selekcija kluba i da sprovodi sve terapijske rehabilitacione i fizioterapeutske mjere koje odredi klubski ljekar.

### **Član 22.**

Klubski fizioterapeut-masera ima pravo na stručno usavršavanje o trošku kluba, nadoknadu za izostanke sa svog radnog mjesta zbog potrebe kluba i ostale nadoknade zavisno od toga kako je regulisan njegov status u klubu.

### **Član 23.**

Medicinska komisija Odbojkaškog saveza Federacije BiH uglavnom se obrazuje od ljekara i fizioterapeuta-masera angažovanih za potrebe odbojkaških reprezentativnih selekcija BiH.

### **Član 24.**

Medicinska komisija Odbojkaškog saveza Federacije Bosne i Hercegovine dužna je da sačini posebno upustvo u vezi sa medicinskom zaštitom članova odbojkaških reprezentacija sa kriterijumima i obavezama koje treba da ispunjavaju ljekari i fizioterapeuti-maseri koji se angažuju u radu sa odbojkaškim reprezentacijama.

### **Član 25.**

Na ono što nije predviđeno ovim Pravilnikom a vezano je za zdravstvenu zaštitu članova Odbojkaškog saveza Bosne i Hercegovine, primjenjivaće se važeći zakonski propisi.

### **Član 26.**

Odbojkaški klubovi učesnici u stalnim takmičenjima u organizaciji OSF BiH odgovorni su za zdravstvenu zaštitu svojih članova.

Odbojkaški Klubovi dužni su preko OSF BiH osigurati sportiste svake godine. Svi Klubovi članovi OSF BiH su dužni dostavljati spiskove u kancelariju OSF BiH na osnovu kojih se potpisuje Ugovor odnosno Polisa sa Osiguravajućom Kućom. Oni Klubovi koji nedostave spiskove ili sa spiskova izostave pojedine igrače-ce snose svu odgovornost ukoliko dođe do povrede igrača-ca.

### **Član 27.**

Tumačenje ovog Pravilnika daje Upravni odbor OS BiH.

### **Član 28.**

Ovaj pravilnik stupa na snagu danom usvajanja na sjednici Upravnog odbora OSF BiH. Stupanjem na snagu ovog Pravilnika stavlja se van snage Pravilnik o zdravstvenoj zaštiti br.197-09/13 od 30.08.2013 god.

Broj: 676-08/15  
Tuzla, 01.07.2015 god.

P R E D S J E D N I K

---

Miloš Jelčić